

## ALAHADY 01 fiaviana TAONA – D



**« Miandrandrà ka asandrato ny lohanareo, fa efa akaiky ny fanavotana anareo »**

Ry Kristianina havana, nankalaza an'i Kristy mpanjaka isika tamin'ny Alahady lasa teo izay namananantsika ny taona litorjika ary amin'izao Alahady voalohan'ny volana desambra izao no hidirantsika amin'ny taoana litorjika vaovao ka I Md Lioka no Evanjely ho banjinintsika manokana amin'ity taona D ity. Md Lioka izay mampisongadina bebe kokoa mikasika ny

famindrampon'Andriamanitra sy i Masina Maria.

Mandritra ny taona isika handalina izany. Faly sy ravo miarahaba antsika amin'izao taona vaovao litorjika izao izay taona ho entintsika Olo Araiky manorina araky ny lohahevitra noraisintsika taorian'ny filankevitra pastôraly. Manorina ho Eglizy Tranon'Andriamanitra sy Eglizy Olona Velona, ho Kristy mpiara-belona amin'olona satria ny teny

Kristianina avy amin'i Kristy ka tahaka an'i Krsty isika kristiana mpitory vaovao mahafaly amin'ny toerana rehetra misy antsika.

Izany no ezaka tsy maintsy ataontsika ka mampirisika antsika hirotsaka bebe kokoa amin'ny vaomiera isankarazany sy ny fikambanana masina izay rafitra misy eo anivon'ny eglizy misy antsika Hanambarana an'i Kristy fahazavana sy fahamarinana. Mba hahatonga antsika ho tena mpandray

Vakiteny I : Jer. 33, 14-16

Tononkira : Salamo 92

Vakiteny II : 1 Tes. 3, 12 — 4, 2

Evanjely : Lk. 21, 25-28. 34-36

an-tànana dia tsy maintsy mikatroka isika ao anatin'ny vaomiera na litorjia, na ny justice et paix, na ny vvs, na ny fahasalamana, na ny vaomieran'ny fanabeazana sns.... Izany no maha taranaka mpanorina antsika.

Izao taona litorjika vaovao izao angatahintsika ny tsodranon'Andriamanitra sy ny fahasoavany hahatonga antsika ho génération des bâtisseurs, ho taranaka mpanorina. Hanomanantsika ny fiavian'I Kristy izany rehetra izany.

Fiaviana no iantsoantsika ny AVENT, raha dinihina dia misy fomba fiatrehana izany fiaviana izany, averiverintsika matetika fa ny fankalazana ho antsika dia tsy hoe mahatsiaro fotsiny fa mivelona no sady miaina noho ny asan'ny Fanahy Masina. Misy ny fomba telo azo hiatrehana ny AVENT ;

Ny fiaviana voalohany izay velomin'ny tenin'Andriamanitra hiainantsika eo anivon'ny Eglizintsika izay mahatonga antsika mamerimberina fa sady mamaky no mivelona ny Tenin'Andriamanitra isika, ho mpanambara ny tenin'Andriamanitra isika amin'ny fiainantsika. Na dia efa 2000 taona lasa aza ny fiaviana homanintsika amin'izao avent izao dia eto anivontsika tokoa ny Tompo ary mivelona amin'ny alalan'ny sakramenta sy ny teniny isika.

Ny fiaviana faharoa dia amin'ny alalan'ny Tenin'Andriamanitra sy Sakramenta ka hiainantsika amin'izao fotoana izao. Ireo no mamelombelona ny fiainantsika ka mahatonga antsika Kristy mpiara-belona, Kristianina ho taranaka mpanorina tokoa.

Ny fiaviana fahatelo dia ilay amin'ny hoavy izay hibanjinintsika amin'ny alalan'ireo vakiteny atolotry ny Eglizy amintsika amin'izao Alahady voalohany Fiavian'ny Tompo izao, Jesoa ho avy amin'ny fomba manetriketrika

Ny tenin'Andriamanitra voalohany bokin'i Jeremia mpaminany *“Amin'izany andro izany, sy amin'izany fotoana izany, hampitsimoka solofo marina ho an'i Davida Aho, izay hitsara araka ny hitsiny sy ny rariny amin'ny tany. Amin'izany andro izany i Jodà, hovanjena ary i Jerosalema handry feizay, ka hantsoina hoe: Tompo-fahamarinantsika.”* Tsy iza io voalaza io fa I kristy Tenin'Andriamanitra. Ny fiaviana dia ao anatintsika ao am-pontsika ao ny Tenin'Andriamanitra mitsiry ka mivelatra, rehefa mivelatra izy dia mahatonga antsika ho mpanorina izany hoe hametraka izany fanjakan'Andriamanitra eo anivon'ny fiainantsika andavanandro ka ho tanteraka ilay Jerosalema. Fantantsika fa Jerosalema dia ilay tanana masina, tananan'ny fiadanana. Rehefa tonga eo anivontsika I Jesoa dia tanteraka ilay Jerosalema satria mivelatra ny fiainantsika miaraka amin'I Jesoa ka zary fiadanana sy masina ny fiainantsika. Izany ny faniriansika hahatonga antsika ho taranaka mpanorina. Ambaran'i Jesoa ao amin'ny Evanjely efa akaiky tokoa ny fanavotana satria rehefa mitsimoka ao amintsika i Jesoa ka mivelatra izy dia tanteraka eo amintsika ireo fanavotana ho entin'I Jesoa izany. Tsy fanavotana arak'izao tontolo izao fa fanavotana mitondra fiadanana, mitondra hafaliana, mitondra hasambarana sy fiombonana ka izany no fanavotana ho antsika satria zary fianakaviana iray ao amin'Andriamanitra isika satria Olo Araiky ao Aminy ka Izy manafaka antsika amin'ny loza rehetra isika. Raha tiantsika izany dia fanantenana no ambaran'ny fankalazana ny *“Avent”* feno fanantenana isika satria Andriamanitra tsy lavitra intsony ny Andriamanintsika, eo anivontsika izy mitantana antsika. Izany no ambaran'I Md Paoly amin'ny vakiteny faharoa ho an'ny Tesalosanina *“Hankahery ny fonareo anie Izy, ary hiaro azy tsy hanan-tsiny amin'ny fahamasinana eo anatrehan'Andriamanitra Raintsika, ho amin'ny fahatongavan'i Jesoa Kristy Tompontosika mbamin'ny olomasiny rehetra. Amen.”*

Izany fankaherezana izany no manosika antsika handresy ireo misakana ny fahatongavan'ny Tompo eo anivontsika araky ny fantantsika dia ny fahotana no vato misakana voalohany. Iza fotoana izao no andro tsara andresentsika ny fahotana izay manapotika ny fiainantsika , manapotika ny tontolo iainantsika. Matetika isika izay tsy miraharaha ny zava-boahary manodidina antsika, hanao ezaka isika amin'izao Avent izao hanarina ny tontolo iainana ka ho mpanorina ny tontolo iainana vaovao mba ho diosezy maintso. Iza fotoana ny mahalegny izao no fikarakarantsika izany, izao fotoana izao nomanampy antsika handray ny Tompo izao vanimpotoana ny fiaviana izao.

Eo koa ny fahotana manapotika ny tontolom-piaianantsika dia ny lainga, ny fitapitaka, ny tsy fahaizana mampanjaka ny rariny sy ny hitsiny eo anivon'ny fiaraha-monina sy ny fianakaviana, ka izao Avent izao no aoka hanampy antsika hanarina ny fiainantsika , ny tontolom-piaianantsika anie mba ho tontolo misy an'Andriamanitra, fampanjakana ny rariny sy ny hitsiny, ny marina, ny fifankatiavana, ny fihavanana marina tsy misy fitaka dia ho tena taranaka mpanorina tokoa isika.

Eo koa ny tontolom-pinoana anjakan'ny fahotana, manapotika ny ain'ANDriamanitra isika, mamono ny aina isika, Andriamanitra mamelona ka amin'izao fiomanana amin'ny Avent fiavian'ny Tompo izao ka enga anie ny fanantenantsika , ny hery nomen'Andriamanitra antsika amin'ny alalaln'ny fibebahana ataontsika hirosoantsika bebe kokoa aimn'ny fiainam-baovao entin'izao fiavian'ny Tompo izao. Samia isika hahay hanararaotra izao vanim-potoanan'ny Avent izao mba hihavao tokoa isika ka ho feno fanentanana ny fontsika, ho fenoin'andriamanitra ny fitiavany ny fontsika ka ho fiainambaovao ao amin'I Kristy tokoa ny fahatongavany.

Efa eto amin'izao tontolo izao ianao ry Kristy ary fantatray izany, eo anivon'ny Eglizy dia ianao no banjininay sy raisinay amin'ny alalan'ny Teninao sy ny Sakramenta ka ampio izahay hahay miomamana bebe kokoa amin'izao dianay mankany amin'ny noely izao, hitombo fitiavana izahay, hampanjaka ny marina izahay, handresy ny ratsy ka mba ho taranaka mpanorina tokoa, mpanorina Eglizy Tranon'Andriamanitra ary ho Eglizy Olona velona izahay eo anivon'ny fiainanay andavanandro, eo anivon'ny fiaraha-monina. Amen

Mompera Arseveka Mgr Benjamin Ramaroson